



回收个人生（北四縣腔）

78 隻「寶特瓶」个塑膠罐仔，就做得做 1 條 6 尺闊，7 尺半長个毛毯；12 隻青色个罐仔，也做得做 1 領毋使染色有「檳果青」色个 POLO 衫，無想著這恁奇妙个世界吧？像變奇術个樣仔，垃圾做得回收再生變黃金？浪蕩个人生也做得回收再重生！

在臺灣慈濟基金會裡背，有環保志工六萬零儕，環保回收站四千五百零位，佢俚兜逐日就在該位做這款變奇術般無錢个頭路，兩年半以來已經做有 30 萬條毛毯，10 萬領衛生衣、POLO 衫，送到世界各地賑災救難，「垃圾變做黃金，黃金化成愛心，愛心匯成清流，清流繞遍全球。」這係盡好个典範，值得大自家來推廣發揚。

回想五、六十年前个時代，去學校讀書愛買一身新衫制服，就毋係恁簡單个事情，大部份學生仔係打赤腳來讀書，較好額个家庭，正有鞋好著。毋過，該兜有鞋好著个學生仔，也異省儉，大體鞋係用來擱个，毋盼得著，逐擺會到學校以前正著等，等到下課又將佢脫忒，擱等一路轉。書包仔也有用大手帕包等揸，落水天拿布袋 dung^[1]頭那來抵水，惜物省儉个精神，異值得分這下時代个後生人來分享。

講著「寶特瓶」个塑膠罐仔，也係這近 30 年來正有个生活用品，頭擺用來裝東西个盞仔，大部份係缶仔做个，過後正有玻璃罐仔、鐵罐仔，這兜罐仔係講無壞忒，大體都會洗淨晾燥來，再

[1] dung'：筒

過使用，盡少拿來擢忒，故所外背異少有麼个盞仔罐仔好拈。記得以前屋下肚，眠床下，大大細細最多个，就係盞缸、鉢仔、缶盞仔、玻璃盞仔，這兜東西毋會壞、毋會綿，有入無出，故所大家屋頂肚囤到異多，變成傳家之寶。

也係客家人省儉做家慣哩，這兜家寶加減就用得著，像滷鹹菜這兜鹹淡、菜頭，過年過節滷雞鴨、豬肉，還有裝覆菜、鹹菜乾、蘿蔔乾、蘿蔔絲、蘿蔔錢、豆豉、豆腐乳、焗米酒、做葡萄酒等等，就會用著異多這兜家啦伙。

玻璃盞仔用到最多个係公賣局用來裝酒，過來就係裝豆油，用過个玻璃盞仔若係還愛回收轉來，買个時節雜貨店就會砵錢，空盞仔拿轉來，砵金正退轉還你。收轉來个空盞仔，一般工廠會請工來洗，洗空盞仔這係異辛苦个頭路，盞仔重又驚摧著打爛忒，搬來搬去愛盡細義，歸日企等，兩隻手浸泡在加藥仔个水兜肚，一日下來，手指就變到白黝黝仔，堵著寒天還較慘，手指冷到痺忒，出血紅膿又做毋得歇睏，實在異辛苦。偌个丈人哀之前就識在豆油工廠做過，講起來實在異心酸，有一擺工廠裡背滑溜溜仔，毋堵好打隻蕩溜仔，跌到四腳惹天，痛到喊阿姆哀，目汁含等，也毋敢多講麼个，第2日也係照常上工，該下，頭路難尋，為著子女、家庭，麼个辛苦摻委屈，通通也忍下來。

「寶特瓶」个發明，實在分大自家生活上帶來異大个利便，佢料仔輕、毋驚摧、毋驚砵，運搬疊貨盡方便，毋過有優點，也有佢个缺點。「寶特瓶」正推出時，一時間恁好用毋會壞又毋會臭，用忒就擢个塑膠罐仔，無麼个別項用途價值，也就無人會特別摻佢收集起來，到尾就摻別項垃圾共下處理。該兜無收轉來个，哪位就有，像個閒神野鬼，水兜肚看得著浮浮冇冇，堵著發大水，涵空、圳溝、河灞，逐位都塞著。這下問題出來哩，垃圾危機傷腦筋，燒又燒毋得，會污染空氣，埋又埋毋得，毋會爛，毋會綿，正經係縱虎歸山，真難收拾。

好在，慢慢仔大家異用心來研究，開發出回收再利用个新產品。「寶特瓶」本身个材質，摺大自家平常著个衫褲「特多隆」化學纖維材質共樣，該兜收轉來个塑膠罐仔，假使做得做著像佢本來个原料恁淨俐，這回收再利用个技術，就無麼个大問題。

這幾年來臺灣大家民眾環保意識提升，配合垃圾分類做到異好，將資源回收个工作做到盡善盡美，圓滿週到，做得講分國際社會做模範無問題。頭前个人做好分類工作，接下來个人愛利用加工加盡方便，品質乜做得做到還較好。像慈濟環保志工，佢兜先摺塑膠罐仔照分類个號碼分開來，像「寶特瓶」係 1 號回收瓶，過來還較功夫摺佢分到 3 類：透明無色个、拉雜有色个摺裝「沙拉油」、「豆油」、「洗髮精」个其他。係講愛還較講究，慈濟志工要求先摺蓋仔、蓋圈仔歸下拿忒，恁樣後背整理加工就毋使恁愁慮，當然後背个工程乜愛異用心，設備、技術、管理、人才樣樣都愛考慮周到，大家兜恁用心，哪有講做毋著、做毋好个頭路。

資源回收再利用，像做到毛毯、衫褲，除忒做得減少地球資源个開發浪費以外，還做得減少能源个耗費摺二氧化碳个排放，回收大約來講，至少有減忒一半个正面效果，對這近百年來過度開發个大地之母——地球來講，多多少少都有兜幫忙，至少對教化人心，改變生活態度、消費方式，還較有效果。

在中壢較偏僻兜仔个鄉下田莊肚，有一位月眉資源回收站，裡背放有一輛異舊个四輪小貨車，像係專門為著資源回收來改裝个，回收站个師兄摺偃講：「這輛車仔个主人已經無在乜，佢係 40 歲正出頭个中年人。」師兄接等講：「這位先生短短个人生，大部份个時間都在坐館仔，4 年前正從監獄出來，就一路尋到這位來。」

這位先生講：「坐館仔這恁多年來，聽著異多師兄師姊在講人間菩提个故事，想想自家也浪蕩地恁多年，浪費貳社會資源也毋會少，這下開始應當愛好好做兜事情，摻社會大眾會失禮正係。這擺出來，係毋係做得請師兄師姊，再來搵手協助佢，從新開始，毋知做得無？」

經由師兄師姊个協助，摻佢尋著一隻高速公路拈垃圾仔个頭路，逐日趕早順等路脣檢拈垃圾，為著想愛在這伸無幾多个有限人生，多做兜仔事情，佢整地這臺車仔，一有閒，佢就去做資源回收、分類、運搬个工作，續等佢還加精進，參加地委員个培訓，成為慈濟委員一員。環保回收个頭路，佢做到越做越歡喜，逐日做到兩頭烏，時間無一息仔打爽貳，旦勢就係恁無閒，佢也會尋時間來陪老阿母，補償補償頭擺荒唐个日仔。

毋過人生个事，萬萬就無想著，舊年 10 月初仔一場交通意外，在高速公路頂，佢在該緊做事个時節，分人个車仔撞死。短短四十零个年華就恁樣結束貳，出山个日仔，地區各地師兄師姊都來摻佢送行，場面異感人，顛倒當地个鄉親著驚，無想著頭擺烏鰂橫過食一塘魚，烏哥流哥个人，仰會轉變到這今晡日个場面？還係爺娘較知子女个心，老阿母講：「唉！可惜佢做佢俵仔个時間貳短咧！」物有物命，人有天命，垃圾回收做得變黃金，人生回收乜正經做得重生！

作者感言

小時候，樹林裡掃起來的落葉，菜園內拔除的枯藤根莖雜草，以及挑菜剩下之菜葉果皮，都可以和著水溝、埤塘撈起的淤泥，以及牲畜的糞便，做成營養價值頗高，有機環保的堆肥；竹林的竹籬枯枝，任何廢棄木製品的殘骸，都是廚房大灶最好的能源燃料。曾幾何時，它變成了垃圾，變成了 1 公斤需要數元處理的廢棄物，還造成嚴重的空氣污染。

感恩社會各角落許許多多，默默無言全心付出的環保志工夥伴們，您的付出也掃淨了很多受污染人們的身心，讓自然回歸自然。

王興宏

國立中央大學 客家研究碩士在職專班 二年級

